

## Was send das för Ziite?

Was send das för Ziite?  
Mit so komische ungewohnte Sache  
Wo mer i üsem Alltag plötzlech müend mache

Maske vor de Nase ond öbers Muul  
Das esch jetzt nötig und seg sogar cool

Nor merksch jetzt leider nömm öb dä vis-a-viii  
Luschtig, wütend oder truurig esch gsii

Gsähnd ehr mech scho? Ghörsch Du mech? So tönts immer  
A de digitale Meetings live us de heimische Zimmer

Sälbscht-, Schnell- oder PCR-Tescht mer hed kei Rueh  
Mit em Wattestäbli bes fascht is Hirni ueh

Positiv esch negativ, ond negativ positiv, das heisst also guet  
Doch au Corona-positiv verlührsch hoffentlich ned de Muet

Abstand halte, keis Handschüttle und kei 3 Küssli, oje  
Das alles tued mer jo zwor ned wahnsinnig weh

Doch wenn ech e änge Frönd oder gueti Kollegin gseh  
Es chorzes Dröcke, e Umarmig das fählt de halt scho meh

Was send das nor för komischi Ziite?  
Wo mer über Impfe oder ned-Impfe tüend striite

Bi de Masere, Kinderlähmig, Mumps do eschs meischtens keis Problem  
Nor wäge dem Corona-Picks wird jetzt de eint oder die ander extrem

Was esch richtig, was esch falsch – jede för sech muess das säbler wösse  
Und wird denn in Zuekunft halt mit de Konsequänze läbe mösse

Was send das för Ziite?  
Üse Verein hed au e langi Pause gmacht  
Mer hed nömm diskutiert und nömm zäme glacht

Mer hed sech nömm troffe zum gmüetliche Zämesii  
Immer i de Hoffnig es gieng möglechtsch schnell verbii

keis Palmebinde und drom keis Blättlischniide vo Hand  
Kei Glüehwy und kei Oepfuchüechli am Wiehnachtsmärt-Stand

Kei GV, keis Diskutiere und Abstimme i de grosse Gruppe  
Keis feins GV-Ässe mit Fleisch, Nudle, Salat ond Suppe

Kei Besichtigung, kei Herbstwanderig, keis Weekend im Schnee  
Kei regelmässigi Träffe wo mer üs alli chönd gseh

Denn send Träffe im Freie ändlich weder mögloch gsii  
Bi de Donnschtigmärsch send doch immer einigi debii

Mer wanderid gemeinsam dors Dorf ond über Fälder  
De Hügu ufe und abe, entlang am See ond dor Wälder

Was send das för Ziite?  
Ich glaube, mer wärdid wohl no wiiter ufs Corona-Ändi plange  
Die Spanisch Gripp esch damals jo au mehreri Johr gange

Was wörd de Adolph Kolping ächt zo dene Ziite säge ond schriibe?  
wo und wie wörd är ächt handle ond was wörd är vorwärts triibe?

Wahrscheinlich wörd ähr üs ermuntere, s'Positive zgseh a dere Gschicht  
Ond üs isetze für üsi Mitmensch, denn das isch üsi Pflicht

Pflicht, als Christ, Kolpingfan und als Vereinsmitglied natürli au  
Mer luegid zonenand, egal öb jung oder alt, Maa oder Frau

Die vöu frei Ziiit wo mer gha händ, esch jetzt zwor weder verbii  
Doch ech glaube, es chönnt au in Zuekunft durchus positiv sii

Wenn mer üs weder *bewusst* Ziiit nänd vörenand  
Und Stunde verbringid im Kolpingkreis mitenand

I dem Sinn tuen ech jetzt nömm länger schnörre  
Sondern mit eme grosse Dank a üch jetzt höre

Danke für euches Dra-bliibe, für üchi Treui au i dene komische Ziite  
Danke, dass ihr Kolping und üse Verein ned eifach stellid uf d'Siite

Danke au im Vorstand und ihrne PartnerInne und ihrne Chend  
Schön, das Orange-Schwarz wiiterhe üchi Lieblingsfarbe send

Gniessid s'Ässe, d'Gmeinschaft, lachid und trenkid, eis oder zwöi  
E schöne Obig, Proscht, Treu Kolping – Kolping treu!